

解州全志目錄 本州

卷之一

星野

沿革

疆域 形勝 舖通附

卷之二

山川 水利 渠堰附

風俗

物產

卷之三

城池 村堡 坊里 橋梁附

壇廟

公署

卷之四

學校 書院 義學附

田賦 丁徭 雜課 鹽引附

戶口

倉儲

兵防

卷之五

職官

官績

卷之六

選舉

卷之七

選舉

附薦辟

貢生

例仕

例貢

武秩

封廕

卷之八

人物

卷之九

人物

卷之十

列女

卷之十一

古蹟 坊表 寺觀 林墓附

祥異

卷之十二

奏疏

卷之十三

藝文

卷之十四

藝文

卷之十五

藝文

卷之十六

藝文

卷之十七

藝文

卷之十八

雜志

解州全志卷之十六

藝文

藝文

重修關廟志序

國朝 喬光烈

以大而聖以聖而神神則昭乎古今尊於天下要其道
一本諸誠易稱聖人齋戒神明其德誠之謂也漢壽亭
侯關聖顯當時而神後世耀光炳靈赫著千載

本朝隆崇禮祀之典尤爲極盛世之論聖者皆曰忠義
予特以爲忠義固聖之大雖然要未足以盡聖夫天下
有聖賢之學有豪傑之資聖賢遠異於豪傑豪傑不必
其聖賢至如聖者所謂豪傑而有聖賢之學者也聖賢

之學存其心者無私養其氣者以直是以至大至剛而配道義夫無私而直誠之謂也天地以誠而四時不忒日月以誠而貞明久照與夫山岳之所以峙江河之所以流莫不一本乎誠聖賢去私而存誠故能與日月齊其光山海同其量以予觀聖生平其浩然剛大而常伸於宇宙者非聖賢而能若是乎凡人心私則僞僞則無以動天地而感鬼神誠則貞貞則有以契昭融而貫金石在易之中孚信及豚魚言中誠可孚雖豚魚之無知猶將格且應焉况含齒戴髮屬在人倫者哉聖之大節備於史書至今讀之者無賢不肖相與感慕而畏敬

何也亦以其誠使之然也或者尊聖並於孔子雖不必
爲定論然而聖賢之學在焉宜其久而愈神被於天下
者其盛如此聖解人也先是州人有爲聖誌者歲月旣
多其鐫板率就蠹落今州守張君重輯之旣成以質於
余余嘉張君之賢能勤於斯舉也因備申其旨而敘之

開濬涑水姚暹渠議

前人

河東所屬之蒲州解州有水道二一曰涑河一爲姚暹
渠二水始導於隋唐之世其來甚久雖非大川鉅瀆然
其爲利害於蒲解者所係實多圖度始終誠不可不早
計蓋河東中條一山自永濟縣風陵渡東至絳縣之橫

嶺關綿亘四百餘里山峪諸水支分流滙一發於橫嶺
由東達西歷聞喜夏縣安邑猗氏臨晉以至虞鄉入五
姓湖由永濟縣歸於黃河是名涑水若姚暹渠則源夏
縣之王谷口亦由東達西歷安邑解州繞大小鹽池外
亦至虞鄉入五姓湖由永濟縣歸於河涑水在北姚暹
渠在南鹽池又在姚暹渠之南明代自成化至嘉靖中
爲鹽池計數治姚暹渠又改穿涑河行道然興罷不常
訖少良法以後相傳及於

國朝唯隨時苴補視其壅潰疏築而已唯涑水性渾濁
伏秋漲作挾帶泥沙滯闕尤易而暹渠水性清長切近

鹽池每相浸溢舊設南北堤堰以防衝潰自乾隆十年
河渠水怒發數縣民田多被淹沒前河東監司常請興
修久之不行及今又且十歲涑渠淤塞彌甚而五姓湖
爲其尾閭者閉涸漸積歲月已深半爲平陸是以比年
七八月交時雨盛作卽泛溢不止凡涑渠所經諸縣非
特不能沾水之利而反被水之害其永濟之榆林趙義
七里諸村民田數千頃悉被淹沒至斷道路民皆築堤
水上以行爲困尤極且不但然也竊常覽其情形思其
究竟其爲可慮有甚切者涑水至猗氏崔家灣南與虞
鄉鄭家營接河高地下水冲決口不循故道折而南趨

又以通渠堤岸亘阻其前凍無所歸致虞鄉邸家營曾家營土橋石橋牌首棗圪塔諸村及解州西王等里落皆其游波之所屯瀦每歲凍當暴漲一切田廬往往蕩沒數十里間竟成澤國且懼水勢勇猛潰裂姚渠南北堤防則倒灌橫衝勢難遏禦解虞城郭及夫大小鹽池其危險更有不可言者此凍水姚渠之宜急爲修治有斷不容緩者也日者因知解州韓桐以是爲請卽會河東官吏躬赴河渠詳加履勘又飭蒲州府及解州知州再三商度詢謀僉同前經條說繪圖上告執事夫古言利不百不更張誠以率作興事之難重土功而惜民力

今以涑渠濬治宜否閭閻解之人以爲當然莫不踴躍則舉順輿情無所勉強利一也興修役繁必需財費而向時涑水則資民力開治姚渠則資商力疏通舊例俱在無費帑金利二也當農隙之時及期興工同力共舉不過兩月即可竣事無妨耕作利三也昨以歲多淫雨猗氏解州各境高阜之區幸免涑患其灘窪卑地上則曾家營諸處下則趙義等村至今積水未消濬而疏之俾浮潦盡洩則田疇被浸者畢出人可佈種且令將來伏秋二汛設有異漲歸槽赴壑亦必順速當免如前時積滯不去之害利四也五姓一湖舊本多魚民資爲業

自堙閉者久而網罟之利亦失今並疏之旣以爲涑渠之委且湖水日盛魚蒲必漸饒因使數縣貧民得藉爲生活計利五也涑水旣治使民得從岸傍分引其水資灌溉度可澆田至千百頃利六也或言明時涑水西流直入河地得其潤故人多殷富而科第仕宦稱盛今蒲視昔不及十之二焉涑疏而後西流如故使復其地脉以阜蒲之人利七也計先事之綢繆見所利之如此敢冒昧具陳

姚暹渠請照例商脩免用民力議 沈 枳

案查乾隆二十六年前鹽院薩奏請借帑大修姚暹渠

案內附錄運使議詳有每年秋冬農隙查明渠底淤澱之處飭地方官傳令南北兩堰附近居民出夫挑濬運同按工給發半價一案今准運使來咨業已通詳請飭挑濬蒲州府楊守又會同解州言牧聯銜通稟語近推諉本道隨面詢地方官開濬姚暹渠同係

朝廷公事何必過分畛域以致彼此稟詳飭令妥協辦理據各該地方官回稱姚暹渠爲鹽池之保障向來從不派撥里民開濬歷有奏案可查且與沿渠居民田廬實無干涉如上流夏縣五里橋至安邑劉家新橋地高渠下水不能泛溢又自安邑劉家新橋歷解州虞鄉縣

兩岸土堰高厚渠水隨漲隨消從無姚渠水發成災之
案今以與民無涉之渠身一旦累民半價歲濬恐滋事
端且渠水挾帶泥沙易於壅滯向聞鹽務衙門承辦開
濬工程甚鉅去冬勘估淤澱處所因值凍土難濬今春
復赴查勘卽與原估情形有異年年淤澱需濬民力實
屬難支等語本道伏查乾隆二十六年以前鹽院薩原奏
內有嗣後逐年挑挖姚暹渠淤淺之處臣卽移會撫臣
熟商妥辦之語是歲濬渠身可否半借民力之處尙須
臨時商辦且查鹽院薩同摺奏請之挑挖黑河一事隨
經奏明停止今以與民無涉之渠工貽小民每歲無窮

之苦累所關非細再查上年估報一百一十五里渠身
僅需半價七十四兩有零在鹽務衙門亦知民辦伊始
民情未洽姑示工程有限可以通融從此每年照辦責
令深通工程勢必歲增將來商捐大脩反得委卸損民
益商似未平允可否仰請執事移商鹽院仍照歷年奏
案商修姚暹渠民挑涑水河成例將姚暹渠仍歸商辦
以省民力以專渠工出自鴻慈本道爲慎重民力起見
且恐章程未定將來地方官與鹽務衙門彼此牴牾亦
於政體有關爲此具陳伏惟鑒察

重修解州城垣記

韓 桐

聖天子御極之八年軫念承平日久直省府州縣城垣或有墮損令封疆大吏勘驗題請發帑繕修於時晉撫憲酌請山西城垣之宜修者而解與焉遵部估計輓輦工役等費可七千餘金有成議矣嗣遵通省輪修次第期於乾隆甲戌起工十二年余自平定調解下車時見城闔傾圯心竊憂之不數月州之紳士耆民具呈請修略曰州城之設由來舊矣考歷代之修率用民力我皇上至仁如天湛恩汪濊有加無已蠲免則各省輪流偏災則多方賑恤屬在子民共沐雨露之恩宜效涓埃之報況解城舊例十六里各定分修尺丈永刻城牆昭